

JOHOR

Darul Takzim

Mustafa Ali Mohamed

disunting oleh
Anita bt Morah Abas

3



PELANDUK PUBLICATIONS

Diterbitkan oleh
Pelanduk Publications (M) Sdn Bhd
23M Jalan SS2/67,
47300 Petaling Jaya,
Selangor, Malaysia.

© Mustafa Ali Mohamed 1987

Semua hak terpelihara. Sebarang bahagian dalam buku ini tidak boleh diterbitkan semula, disimpan dalam cara yang boleh dipergunakan lagi, ataupun dipindahkan, dalam sebarang bentuk atau dengan sebarang cara, baik dengan cara elektronik, mekanikal, penggambaran semula, perakaman ataupun sebaliknya, tanpa izin terlebih dahulu dari Pelanduk Publications (M) Sdn. Bhd.

Rujukan

Haji Buyong Adil — *Sejarah Johor* — Dewan Bahasa dan Pustaka, 1980.

ISBN No. 967-978-118-6 (Siri)
967-978-123-2

M
959.5119
Mus

411138
APB

24 MAY 1988
Perpustakaan Negara
Malaysia

Sejarah Ringkas Negeri Johor

(Johor adalah negeri yang kedua besarnya di Semenanjung Malaysia. Ia terletak di selatan Semenanjung Malaysia. Johor terpisah dari Singapura oleh Selat Tebrau. Sebuah jambatan telah dibina bagi menghubungkan negeri Johor dengan Singapura. Jambatan ini dinamakan Tambak Johor.

/ Negeri Johor mempunyai ramai penduduk. Penduduknya terdiri dari berbagai bangsa, agama dan keturunan. Negeri ini amat pesat membangun. Sumber pendapatan negeri ini adalah hasil pertanian, perlombongan dan perindustrian. Negeri Johor adalah pengeluar nanas yang terbanyak di Semenanjung Malaysia.

/ Pada abad ke-15, negeri Johor adalah di bawah jajahan takluk Kesultanan Melayu Melaka. Walaupun negeri Melaka telah ditawan oleh Portugis dalam tahun 1511 tetapi negeri Johor masih tetap berada di bawah pemerintahan Sultan Melaka.

/ Sultan Johor yang pertama ialah Sultan Mahmud Shah. Baginda adalah sultan terakhir yang memerintah negeri Melaka ketika diserang oleh Portugis. Sultan Mahmud terpaksa melarikan diri apabila negeri Melaka diduduki oleh Portugis. Negeri Johor menjadi tempat perlindungan baginda. Baginda membuat kerajaan baru di sana. Ini dengan jelas menunjukkan kepada kita bahawa Kesultanan Melayu Johor bermula dari Kesultanan Melayu Melaka.



Peta Negeri Johor



Sultan Mahmud Shah memerintah negeri Johor selama 17 tahun. Semasa dalam buangan di negeri Johor, baginda tidak berputus asa berusaha untuk mendapatkan kembali negeri Melaka dari Portugis. Tetapi usaha baginda gagal hingga baginda mangkat pada tahun 1528. Baginda kemudiannya diganti oleh putera baginda, Sultan Alauddin Riayat Shah (II) sebagai Sultan Johor Ke-2. Baginda menaiki takhta pada tahun 1528. Sultan Alauddin telah memilih Kota Kara sebagai kubu pertahanan. Tetapi apabila Portugis datang menyerang dalam tahun 1535, baginda terpaksa berundur ke Sayong.

Perbuatan orang-orang Portugis ini menyebabkan orang-orang Melayu Johor marah. Mereka telah melakukan sekatan dan rompakan ke atas kapal-kapal yang datang bermiaga di Melaka. Akibatnya, perdagangan terganggu. Pada suatu ketika, orang-orang Melayu Johor telah menyerang dan membunuh seramai 30 orang Portugis apabila angkatan Portugis itu mengganggu mereka.

Sultan Alauddin mangkat di Johor Lama pada tahun 1564. Putera baginda iaitu Raja Muzaffar Shah menggantikan baginda. Baginda menaiki takhta pada tahun 1564. Baginda bergelar Sultan Muzaffar Shah. Baginda adalah Sultan Johor Ke-3. Sultan Muzaffar Shah telah memilih tempat persemayaman di Bukit Seluyut dan menjadikannya sebagai pusat pemerintahan kerajaan Johor.

Pada masa pemerintahan baginda, hubungan di antara kerajaan Johor dengan kerajaan Acheh tidaklah baik. Baginda menganggap Sultan Acheh sebagai musuh ketat. Ini adalah kerana Sultan Acheh mengatakan bahawa negeri Johor adalah di bawah jajahan takluknya. Tetapi kenyataan Sultan Acheh ini dengan segera dinafikan oleh Sultan Muzaffar Shah. Baginda tidak mahu negeri Johor dikuasai oleh mana-mana kuasa luar. Sultan Muzaffar Shah dikatakan sebagai seorang yang berbadan kurus, tinggi dan mempunyai perwatakan sebagai


seorang pemerintah.)

Dari segi sifat-sifat diri, Sultan Muzaffar Shah adalah seorang penyayang dan pengasih. Baginda sangat sayang kepada anak saudara baginda iaitu Raja Abdul Jalil. Baginda menganggap Raja Abdul Jalil sebagai putera baginda sendiri. Sultan Muzaffar mempunyai seorang putera bernama Raja Abdullah yang lebih kurang sebaya dengan Raja Abdul Jalil. Walaupun baginda sayangkan Raja Abdullah tetapi baginda lebih sayangkan Raja Abdul Jalil.

Oleh kerana kasihnya baginda terhadap Raja Abdul Jalil, baginda telah melantik Raja Abdul Jalil sebagai Raja Muda. Raja Abdul Jalil bakal menggantikan baginda kelak. Pelantikan Raja Abdul Jalil sebagai Raja Muda Johor tidak disenangi oleh beberapa orang besar-besar. Tetapi ini tidak diketahui oleh Sultan Muzaffar Shah. Setelah memerintah selama lebih kurang 6 tahun, Sultan Muzaffar Shah mangkat di Seluyut dalam tahun 1570.)

Seperti biasa, setiap yang pergi ada penggantinya. Sebagai pengganti, Raja Abdul Jalil telah dilantik sebagai Sultan Johor Ke-4 pada tahun 1570. Baginda bergelar Sultan Abdul Jalil Shah (I). Ketika ditabalkan sebagai Sultan Johor, baginda baru berusia 8 tahun. Disebabkan usia baginda yang terlalu muda ini, tentulah baginda tidak tahu lagi tugas-tugas dan tanggungjawab baginda terhadap segala urusan pemerintahan dan pentadbiran. Oleh itu, buat sementara waktu, pemerintahan negeri dipangku oleh Bendahara Seri Maharaja.)

Kemangkatan Sultan Muzaffar Shah telah digunakan dengan sebaik-baiknya oleh orang besar-besar yang tidak sukakan Sultan Abdul Jalil. Mereka telah merancang satu pakatan jahat untuk menghapuskan Sultan Abdul Jalil. Rancangan mereka berjaya juga akhirnya. Tidak sampai setahun menduduki takhta kerajaan, Sultan Abdul Jalil mangkat dengan tiba-tiba. Baginda telah diracun oleh orang-orang yang



Pemandangan Johor Bahru

✓

berperasaan dengki terhadap baginda. Baginda mangkat ketika berusia 9 tahun.)

(Perlantikan sultan yang berikutnya telah menimbulkan kekecuhuan. Sepatutnya, Raja Abdullah (putera Sultan Muzaffar Shah) menjadi Sultan Johor tetapi ini ditentang oleh emak saudara baginda iaitu Raja Fatimah. Pada masa itu, Raja Abdullah masih lagi kecil. Ini disebabkan Raja Fatimah (adinda kepada Sultan Muzaffar Shah dan bonda kepada Sultan Abdul Jalil Shah (I)), mahukan suami baginda iaitu Raja Umar ditabalkan sebagai Sultan Johor. Baginda mengugut akan keluar dari negeri Johor bersama Raja Umar sekiranya Bendahara tidak mahu menerima Raja Umar sebagai Sultan Johor. (Raja Umar adalah putera Sultan Pahang.)

Bendahara menjadi serba salah. Satu mesyuarat telah diadakan di antara orang besar-besar Johor untuk menentukan siapakah yang akan menjadi sultan. Kata sepakat telah dicapai. (Raja Umar dilantik menjadi Sultan Johor Ke-5. Baginda bergelar Sultan Ali Jalla Abdul Jalil Shah (II).)

Dalam masa pemerintahan baginda ini, permusuhan di antara negeri Johor dengan Portugis masih lagi berlanjutan. Di antara peristiwa penting yang telah berlaku dalam masa pemerintahan baginda ialah negeri Melaka mengalami kebuluran. Peristiwa ini berlaku dalam tahun 1586. Sultan Ali telah menitahkan supaya Selat Singapura ini disekat. Cara sekatan ini ialah dengan menenggelamkan beberapa buah tongkang dan perahu besar yang diisi dengan ketul-ketul batu besar. Keadaan ini menyebabkan bekalan makanan yang dihantar ke negeri Melaka melalui jalan laut tidak dapat dibawa masuk. Dengan itu, negeri Melaka menghadapi ancaman kebuluran.

Pihak Portugis di Melaka terpaksa meminta bantuan dari Goa, India. Dalam tahun 1587, pihak Portugis dengan bantuan dari Goa telah menyerang negeri Johor. Angkatan perang

Johor yang terdiri dari orang-orang Melayu telah berjuang dengan berani demi mempertahankan kedaulatan negeri mereka. Jika dibandingkan dengan pihak Portugis, sudah tentulah mereka ini tidak mempunyai alat-alat senjata yang moden. Angkatan perang Johor kekurangan senjata sedangkan pihak Portugis menggunakan meriam. Namun demikian, dengan semangat mereka yang kuat, angkatan perang Johor ini telah berjaya mematahkan serangan Portugis pada 23hb Julai 1587. Ini tidak bermakna angkatan perang Johor telah mencapai kemenangan muktamad.

Orang-orang Portugis masih tidak berpuas hati dengan serangan yang pertama dahulu. Mereka telah membuat serangan sekali lagi dalam bulan Ogos tahun 1587. Serangan kali ini dilakukan dengan besar-besaran. Angkatan perang Johor tidak dapat mempertahankan negeri Johor dari serangan pihak Portugis yang bertubi-tubi itu. Akhirnya mereka kalah. Sultan Ali terpaksa berundur ke Batu Sawar dan baginda mangkat di sana.

(Setelah mangkatnya Sultan Ali, baginda telah diganti oleh putera sulung baginda iaitu Raja Mansur. Raja Mansur dilantik menjadi Sultan Johor Ke-6 pada tahun 1597. Baginda memakai gelaran Sultan Alauddin Riayat Shah (III). Sultan Alauddin tidak berminat menjalankan pentadbiran negeri. Oleh itu, baginda telah menyerahkan pentadbiran negeri kepada adindanya, Raja Abdullah dan Bendahara Tun Seri Lanang.) Sebenarnya, Sultan Alauddin adalah seorang sultan yang tidak punya rasa tanggungjawab terhadap negeri dan rakyat baginda. Baginda suka menghabiskan masa berfoya-foya dengan dayang-dayang, gundik-gundik dan pegawai-pegawai istana yang sebaya dengan baginda.

Sultan Alauddin telah memilih Batu Sawar sebagai pusat pemerintahan. Mengikut catatan sejarah, Batu Sawar adalah sebuah pekan. Letaknya lebih kurang 10 kilometer jauhnya

mudik dari Kuala Sungai Johor. Bentuk bandar ini hampir-hampir empat persegi. Kubu pertahanan bandar ini diperbuat daripada pancang-pancang kayu besar, rapat dan tingginya lebih kurang 3.6 meter.


Satu peristiwa lain telah berlaku dalam masa pemerintahan Sultan Alauddin. Dua orang kerabat diraja negeri Johor telah membuat hubungan baik dengan dua kuasa asing yang bermusuhan iaitu Portugis dan Belanda. Dua orang kerabat diraja ini ialah Sultan Alauddin dan Raja Abdullah (adinda baginda sendiri). Sultan Alauddin telah membuat perdamaian dengan pihak Portugis. Pihak Portugis menyambut baik perdamaian ini. Raja Abdullah tidak sukakan orang-orang Portugis. Baginda bersahabat baik dengan orang-orang Belanda.

Kerajaan Acheh pula tidak sukakan orang-orang Portugis. Portugis adalah musuh mereka. Sultan Acheh pada masa itu ialah Sultan Iskandar Muda Mahkota Alam. Baginda telah menitahkan angkatan perang Acheh menyerang negeri Johor pada tahun 1613 kerana marahkan Sultan Alauddin yang bersahabat baik dengan Portugis. Negeri Johor dapat dikalahkan. Sultan Alauddin ditawan. Raja Abdullah pula dikahwinkan dengan adinda Sultan Acheh.

Setahun kemudian, Sultan Alauddin dibebaskan. Baginda berjanji akan membantu Acheh menyerang Portugis. Tetapi nampaknya, Sultan Alauddin telah memungkiri janji baginda. Baginda tetap mengadakan hubungan baik dengan Portugis. Pada masa itu, Sultan Acheh sedang membincangkan serangan yang akan dilakukan ke atas Portugis bersama Raja Abdullah di negeri Acheh. Sultan Alauddin tidak turut serta.

Apabila mendapat tahu Sultan Alauddin berbaik semula dengan Portugis, Sultan Acheh tersangat marah. Baginda tidak dapat bersabar lagi. Dengan itu, pada tahun 1615, Sultan Acheh telah menyerang negeri Johor di Batu Sawar. Sultan

Alauddin terpaksa berundur ke Seluyut, tetapi baginda telah ditawan oleh askar-askar Aceh. Sultan Alauddin telah dibawa ke Aceh. Baginda dijatuhkan hukuman bunuh. Dengan ini, berakhirlah pemerintahan Sultan Alauddin Riayat Shah (III). Berdasarkan kepada peristiwa ini, dapatlah diringkaskan seperti di bawah:



Acheh + Portugis = musuh

Portugis + Belanda = musuh

Belanda + Acheh = musuh

Johor (Sultan Alauddin) + Portugis = baik

Johor (Raja Abdullah) + Belanda = baik

Johor + Acheh = hubungan keluarga. (Raja Abdullah berkahwin dengan adinda Sultan Acheh.)

Pada penghujung tahun 1615 dengan persetujuan Sultan Acheh, Raja Abdullah telah dilantik menjadi Sultan Johor Ke-7. Baginda memakai gelaran Sultan Abdullah Ma'ayat Shah.

Sultan Abdullah merasakan bahawa Batu Sawar tidak begitu selamat untuk baginda. Baginda pun berpindah ke Pulau Lingga. Pada awal tahun 1623, Sultan Acheh telah menyerang negeri Johor di Pulau Lingga. Ini disebabkan Sultan Acheh merasa terhina kerana Sultan Abdullah menceraikan isteri baginda (adinda Sultan Acheh). Sultan Ab-

dullah terpaksa meninggalkan Pulau Lingga dan memilih Pulau Tambelan sebagai tempat persemayaman yang baru. (Tidak berapa lama kemudian iaitu dalam bulan Mac tahun 1623, Sultan Abdullah mangkat di Pulau Tambelan.)

Sebagai pengganti, orang besar-besar Johor telah melantik Raja Bujang menjadi Sultan Johor Ke-8. Baginda dikenali sebagai Sultan Abdul Jalil Shah (III).) Baginda menaiki takhta pada tahun 1623. Semasa dilantik menjadi Sultan Johor, baginda telah dikenakan satu syarat. Syaratnya ialah Raja Bujang hendaklah mengakui bahawa Raja Bajau iaitu putera Raja Abdullah Ma'ayat Shah bakal menggantikan baginda sekiranya baginda ditakdirkan mangkat. Dengan kata lain, Raja Bajau adalah Raja Muda Johor. Raja Bujang bersetuju dengan syarat itu. Tetapi Raja Bajau mangkat lebih awal dari Raja Bujang iaitu pada tahun 1676. Baginda meninggalkan seorang putera bernama Raja Ibrahim.

(Setahun kemudian, Sultan Abdul Jalil pula mangkat. Dengan mangkatnya Sultan Abdul Jalil, Raja Ibrahim telah dilantik sebagai Sultan Johor Ke-9. Baginda bergelar Sultan Ibrahim Shah. Baginda menaiki takhta pada tahun 1677. Baginda telah memilih Riau sebagai pusat pemerintahan dan akhirnya mangkat di situ pada tahun 1685.)

(Sultan Mahmud Shah (II) ialah Sultan Johor Ke-10. Baginda adalah putera kepada Sultan Ibrahim. Ketika baginda dilantik menjadi Sultan Johor pada tahun 1685, baginda masih lagi kanak-kanak. Baginda baru sahaja berusia 10 tahun.) Tempat persemayaman baginda tidak bertukar, tetap di Riau juga. Oleh kerana usia baginda, pemerintahan negeri Johor telah dipangku oleh bonda baginda. Tetapi orang sebenarnya yang berkuasa dalam pemerintahan negeri Johor ialah nenda Sultan Mahmud iaitu Paduka Raja Tun Abdul Jamil.

Bendahara Seri Maharaja Tun Habib Abdul Majid tidak sukaikan Paduka Raja. Ini disebabkan pengaruh dan kuasa

Bendahara Seri Maharaja berkurangan semenjak Paduka Raja bermaharajalela. Paduka Raja dikatakan hendak menguasai seluruh kerajaan Johor — Pahang. Kedua-dua orang besar Johor ini saling bermusuhan. Akhirnya, Paduka Raja dapat disingkirkan daripada kerajaan Johor. Beliau pergi ke Terengganu dan mangkat di sana pada tahun 1688.

Sultan Mahmud Shah adalah seorang sultan yang sangat zalim dan bengis. Mengikut satu cerita, baginda telah membelah perut isteri Megat Seri Rama yang sedang mengan dung. Isteri Megat Seri Rama dikatakan terlalu mengidamkan buah nangka. Beliau telah meminta seulas nangka dari sebiji nangka yang belum dipotong untuk santapan baginda. Oleh kerana merasakan kasihan, isteri Megat Seri Rama telah diberikan seulas nangka. Lagipun, pada waktu itu bukannya musim buah nangka dan ini sudah tentulah sukar bagi isteri Megat Seri Rama untuk mendapatkannya.

Pada masa isteri Megat Seri Rama dibunuh oleh Sultan Mahmud Shah dengan membelah perutnya, Megat Seri Rama tiada. Beliau pergi berperang di luar negeri Johor. Megat Seri Rama adalah hulubalang baginda. Apabila mendapat tahu berita kematian isterinya, Megat Seri Rama terlalu marah. Kesalahan yang dilakukan oleh isterinya hanyalah kecil sahaja. Beliau hanya memakan seulas nangka yang hendak dipersembahkan kepada Sultan Mahmud. Hukuman yang dijatuhkan tidak setimpal dengan kesalahan yang telah dilakukan. Ianya boleh diampunkan sekiranya Sultan Mahmud punya rasa belas kasihan dan memahami keadaan isteri Megat Seri Rama.

Di atas perbuatan baginda itu, Megat Seri Rama telah menuntut bela. Megat Seri Rama telah membunuh Sultan Mahmud Shah ketika baginda sedang dijulang untuk pergi menunaikan sembahyang Jumaat. (Ketika itu, baginda baru sahaja berusia 24 tahun.

Dengan mangkatnya Sultan Mahmud Shah (II) itu, maka

berakhirlah keturunan Sultan Melaka memerintah Johor. Sebaliknya, pemerintahan atau takhta negeri Johor telah diambil alih oleh keturunan Bendahara Johor. Ini disebabkan Sultan Mahmud Shah (II) tidak mempunyai seorang waris untuk menduduki takhta negeri Johor.

Satu mesyuarat telah diadakan untuk memilih Sultan Johor yang seterusnya. Pada tahun 1699, dengan persetujuan orang besar-besar Johor, Bendahara Paduka Raja Tun Abdul Jalil telah dilantik sebagai Sultan Johor. Baginda bergelar Sultan Abdul Jalil Riayat Shah (IV).

(Sultan Abdul Jalil adalah seorang raja yang sederhana lagi adil. Baginda juga seorang yang alim dan kuat mengerjakan amal ibadat.) Baginda sering menjemput beberapa orang alim ulama ke istana baginda untuk mempelajari agama Islam dengan lebih mendalam lagi. Disebabkan ini, urusan pemerintahan negeri telah diserahkan kepada adinda baginda iaitu Tun Mahmud. (Dalam masa pemerintahan Sultan Abdul Jalil, muncul seorang tokoh yang bernama Raja Kechil dari negeri Siak. Raja Kechil telah menyerang dan menakluki negeri Johor pada 21hb Mac 1718. Raja Kechil telah menduduki takhta negeri Johor dengan memakai gelaran Sultan Abdul Jalil Rahmat Shah.)

Sultan Abdul Jalil Riayat Shah (IV) telah dibenarkan tinggal di negeri Johor dan dilantik sebagai Bendahara semula. Raja Kechil telah mengahwini Tengku Kamariah iaitu puteri kepada Sultan Abdul Jalil. Saudara Tengku Kamariah tidak menyetujui perkahwinan ini. Mereka juga tidak mahu Raja Kechil berkuasa di negeri Johor. Mereka mencari jalan untuk menyingkirkan Raja Kechil dari negeri Johor. Oleh itu, mereka telah meminta pertolongan dari Raja Bugis Lima Ber-saudara. Raja-raja Bugis itu menyatakan persetujuan mereka untuk menolong Sultan Abdul Jalil mendapatkan kembali takhta negeri Johor. Akhirnya, dalam tahun 1722 Raja Kechil

dapat ditewaskan. Raja Kechil hanya sempat menjadi Sultan Johor selama lebih kurang 4 tahun.

Dengan tewasnya Raja Kechil pada tahun 1722, putera Sultan Abdul Jalil telah dilantik sebagai Sultan Johor Ke-13. Putera baginda ini bernama Raja Ibrahim. Baginda memakai gelaran Sultan Sulaiman Badrul Alam Shah. Baginda bukan sahaja menjadi Sultan negeri Johor, tetapi juga sultan bagi negeri Riau, Lingga dan Pahang (Johor — Riau — Lingga — Pahang). Pusat pemerintahan baginda ialah di Riau.

Dalam masa pemerintahan baginda, baginda menjalinkan hubungan persahabatan dengan Raja-raja Bugis Lima bersaudara. Hubungan ini dipereratkan lagi dengan ikatan perkahwinan di antara kerabat diraja Johor dengan kerabat diraja Bugis. Dalam pada itu, Raja Kechil telah menyerang Riau sekali lagi. Serangan ini dilakukan pada tahun 1726. Tetapi, malang bagi Raja Kechil. Beliau kalah ditentang oleh orang-orang Bugis. Raja Kechil balik semula ke tempat asalnya iaitu di Siak.

Beberapa lama kemudian, Sultan Sulaiman telah jatuh gering di Riau. Akhirnya, baginda mangkat di Riau dalam tahun 1760. Pada masa itu, baginda berusia 60 tahun.)

Raja Abdul Jalil telah ditetapkan sebagai pengganti Sultan Sulaiman. Tetapi di hari pengkebumian Sultan Sulaiman, Raja Abdul Jalil sedang gering di Selangor ketika membuat lawatan di sana. Akibatnya, baginda tidak dapat hadir di upacara pengkebumian itu. Mengikut adat istiadat Raja-raja Melayu, pengganti sultan dilantik ketika upacara permakaman dijalankan. Dengan itu, Raja Abdul Jalil tidak dapat dilantik menjadi sultan. Walau bagaimanapun, Raja Abdul Jalil mangkat 5 bulan selepas kemangkatan ayahanda baginda.

Oleh itu, dengan persetujuan orang besar-besar Melayu Johor, (putera Raja Abdul Jalil iaitu Raja Ahmad telah dilantik

sebagai Sultan Johor Ke-15 pada tahun 1761. Ketika itu, Raja Ahmad baru berusia 9 tahun. Disebabkan usia baginda itu, segala urusan pemerintahan negeri dijalankan oleh Daing Kemboja. Malangnya, dalam tahun itu juga, Sultan Ahmad mangkat pada usia yang sangat muda.)

(Dengan kemangkatan Sultan Ahmad, Raja Mahmud telah dipilih sebagai pengganti. Raja Mahmud adalah adinda Sultan Ahmad. Ketika ditabalkan sebagai sultan, Raja Mahmud juga masih kecil seperti kakanda baginda tetapi usia baginda lagi muda iaitu baru berusia setahun. Oleh itu, segala urusan pentadbiran negeri telah diserahkan kepada Daing Kemboja. Daing Kemboja adalah keturunan Bugis. Negeri Johor dipengaruhi oleh kuasa Bugis bermula dari Sultan Sulaiman Badrul Alam Shah, setelah baginda berjaya menewaskan Raja Kechil pada tahun 1722.

Dalam tahun 1784, orang-orang Bugis yang berkuasa di Johor telah dapat ditewaskan oleh pihak Belanda. Belanda juga telah dapat menguasai Riau dan juga pelabuhannya dari kerajaan Johor.

Namun begitu, Riau telah dapat dimiliki semula oleh kerajaan Johor pada zaman pemerintahan Sultan Mahmud Shah (III) setelah pihak Inggeris dapat merampas Melaka dan Riau dari tangan Belanda pada tahun 1795.

Sultan Mahmud mangkat di Lingga dalam tahun 1812. Baginda meninggalkan dua orang putera iaitu Tengku Hussain dan Tengku Abdul Rahman. Sebelum dilantik pengganti, kuasa pemerintahan Johor — Riau — Lingga — Pahang dipegang oleh Yamtuan Muda Raja Jaafar di Riau.

Semasa melantik sultan yang berikutnya, timbul perselisihan faham di antara Yamtuan Muda Raja Jaafar dengan orang besar-besar Johor. Yamtuan Muda Raja Jaafar mahukan Tengku Abdul Rahman menjadi sultan manakala

orang besar-besar memilih Tengku Husain menjadi sultan. Tengku Husain adalah kakanda Tengku Abdul Rahman. Mengikut adat istiadat perlantikan Sultan Johor, putera sulung yang berhak dilantik menjadi sultan. Oleh itu, cadangan Raja Jaafar telah ditentang hebat oleh orang besar-besar Johor. Perbuatan Raja Jaafar ini adalah bertentangan dengan adat istiadat negeri Johor yang telah ditetapkan.

Sementara itu, jenazah Almarhum Sultan Mahmud tidak dapat dikebumikan kerana pengganti baginda belum lagi dilantik. Mengikut adat istiadat perlantikan sultan, pengganti sultan iaitu Tengku Husain mesti hadir semasa upacara pengkebumian itu dijalankan tetapi pada masa itu Tengku Husain sedang berada di Pahang. Pengkebumian jenazah Almarhum tidak boleh ditangguhkan lebih lama lagi. Oleh kerana itu, Tengku Abdul Rahman telah dilantik menjadi pewaris takhta kerajaan Johor.

Pada mulanya, Tengku Abdul Rahman enggan menerima perlantikan itu kerana ayahanda baginda, Sultan Mahmud telah berwasiat supaya kakanda baginda Tengku Husain hendaklah dilantik menjadi Sultan Johor. Baginda pula diwasiatkan supaya pergi menunaikan fardu haji ke Mekah. Ini disebabkan baginda adalah seorang yang alim. Baginda tidak berani melanggar wasiat ayahandanya. Namun begitu, atas pujuhan dan helah Raja Jaafar akhirnya, Tengku Abdul Rahman terima juga perlantikan tersebut.

Tiga hari setelah upacara pengkebumian dijalankan, Tengku Abdul Rahman dilantik menjadi Sultan Johor — Riau — Lingga — Pahang Ke-17. Baginda bergelar Sultan Abdul Rahman Muazzam Shah.

Apabila Tengku Husain kembali dari Pahang, baginda telah menuntut hak baginda sebagai Sultan Johor. Pada mulanya, Sultan Abdul Rahman mahu menyerahkan takhta kerajaan kepada Tengku Husain. Tetapi Raja Jaafar tidak

menbenarkan. Beliau mengatakan sekiranya Sultan Abdul Rahman turun dari takhta kerajaan, baginda akan kehilangan hak pencegah dan boleh jadi juga akan tersisih jauh dari istana dan orang lain tidak akan mempedulikan baginda. Baginda termakan juga kata-kata Raja Jaafar itu. Dengan itu, baginda tidak jadi menyerahkan takhta kerajaan kepada Tengku Husain.

Sebenarnya, Raja Jaafar mempunyai muslihat untuk kepentingan dirinya dengan melantik Tengku Abdul Rahman sebagai sultan. Muslihatnya ialah sekiranya Tengku Husain menjadi sultan, harapan beliau untuk mendapat pengaruh dan kuasa adalah tipis malah kuasa beliau akan berkurangan. Sebaliknya pula, dengan perlantikan Tengku Abdul Rahman menjadi sultan, harapannya untuk menambahkan pengaruh dan kuasa serta mengambil alih pemerintahan negeri adalah luas. Ini adalah kerana Sultan Abdul Rahman mempunyai sikap yang bertentangan dengan Tengku Husain. Baginda lebih banyak menghabiskan masa dengan membuat amal ibadat dan tidak mengambil berat tentang hal-hal pentadbiran.

Rancangan Raja Jaafar berjaya juga akhirnya. Meskipun Sultan Abdul Rahman adalah Sultan Johor tetapi orang yang sebenarnya berkuasa dalam pemerintahan kerajaan Johor — Riau ialah Yamtuan Muda Raja Jaafar. Sultan Abdul Rahman hanya menerima arahan dari beliau sahaja. Baginda bersemayam di Lingga manakala Yamtuan Raja Jaafar pula tinggal di Riau.

Tengku Husain sungguh marah. Sebagai putera sulung, baginda berhak ke atas takhta kerajaan negeri Johor tetapi tuntutan baginda gagal kerana tiada siapa yang menyokong baginda.

Tengku Husain kemudiannya pergi berjumpa Raja Hamidah di Pulau Penyengat dan menceritakan peristiwa yang menimpa dirinya. Raja Hamidah adalah ibu tiri Tengku Hu-



Sir Stamford Raffles

sain. Baginda menyebelahi Tengku Husain, begitu juga Bendahara Pahang Tun Ali. Raja Hamidah juga tidak menyetujui perlantikan Tengku Abdul Rahman sedangkan Tengku Husain masih hidup dan waris sebenar takhta negeri Johor. Oleh sebab itu, sewaktu pertabalan Sultan Abdul Rahman, Raja Hamidah enggan menyerahkan alat-alat kebesaran kerajaan Johor.

Di bawah pemerintahan Yamtuan Muda Raja Jaafar, negeri Johor tidak mengalami apa-apa kemajuan kerana beliau lebih menumpukan kemajuan negeri di Lingga, Riau dan Singapura. Beliau bersahabat baik dengan Belanda, menerima segala pembaharuan dan kemajuan yang dibuat oleh Orang Putih, bersahabat baik dengan raja-raja dari negeri-negeri lain dan lain-lain lagi. Kemajuan ini menyebabkan orang-orang Inggeris dan Belanda berminat untuk campur tangan dalam pemerintahan kerajaan Johor — Riau — Lingga — Pahang. Pihak Inggeris mendapat tahu bahawa Sultan Abdul Rahman dan Tengku Husain bermusuhan antara satu dengan lain. Pihak Inggeris telah mengambil kesempatan dari perselisihan yang berlaku antara Tengku Husain dengan Sultan Abdul Rahman.

Seorang Leftenan Gabenor Inggeris di Bangkáhulu, Thomas Stamford Raffles telah sampai di Pulau Sekijang dekat Singapura pada 28hb Januari 1819 dengan tujuan hendak menakluk negeri Johor, Singapura, di Kepulauan Riau, Lingga dan Kerimun. Beliau tiba bersama dengan 8 buah kapal dan pada keesokan harinya Thomas Stamford Raffles dan angkatannya telah masuk ke Pelabuhan Singapura.

Raffles telah pergi menemui Temenggong Seri Maharaja Abdul Rahman iaitu pemerintah bagi kerajaan Johor — Singapura. Dalam perjumpaan itu, Raffles telah cuba memujuk Temenggong Seri Maharaja Abdul Rahman supaya pihak Inggeris dibenarkan tinggal dan membina gudang di

Singapura. Sebagai ganjaran, Temenggong Abdul Rahman akan menerima wang daripada pihak Inggeris sebanyak \$3,000 setiap tahun. Akhirnya dengan pujuan Raffles, Temenggong Abdul Rahman telah membenarkan pihak Inggeris tinggal di Singapura.

Oleh kerana Thomas Stamford Raffles ingin menguatkan kedudukan Inggeris di Singapura, beliau telah menghantar orang-orangnya supaya mengambil Tengku Husain dari Riau untuk dibawa ke Singapura. Tengku Husain sampai ke Singapura pada 1hb Februari 1819.

Lima hari kemudian iaitu pada 6hb Februari 1819, satu istiadat telah diadakan oleh orang-orang Inggeris di Padang Singapura di mana Raffles melantik Tengku Husain sebagai Sultan Johor ke-18 dengan gelaran Sultan Husain Shah. Pada hari itu juga, perjanjian sebenar ditandatangani yang membenarkan kompeni Inggeris menetap di Singapura, membina gudang dan menjalankan urusan perniagaan. William Farquhar dilantik menjadi Residen Singapura dan menjalankan pemerintahan Inggeris di pulau itu. Ini bermakna, pulau Singapura telah masuk ke dalam pengaruh Inggeris.

Perbuatan Inggeris ini telah mengakibatkan kerajaan Johor menuju kepada perpecahan kerana negeri Johor menjadi rebutan di antara keturunan Sultan Husain Shah dengan keturunan Temenggong Seri Maharaja Abdul Rahman. Temenggong Seri Maharaja Abdul Rahman berada di Lingga dan Sultan Husain berada di Singapura. Ini bermakna Sultan Abdul Rahman Muazzam Shah adalah sultan yang akhir bagi kerajaan Johor — Riau — Lingga — Pahang dan setelah itu baginda hanya menjadi sultan bagi kerajaan Riau — Lingga sahaja. Dengan itu juga, berakhirlah kedudukan baginda sebagai Sultan Johor pada tahun 1819.

Sebelum Raffles meninggalkan Singapura pada 7hb Jun 1823, Raffles telah membuat suatu perjanjian baru dengan

Sultan Husain Shah dan Temenggong Abdul Rahman. Di antara kandungan perjanjian itu ialah Sultan Husain menerima bayaran wang sebanyak \$1,500 tiap-tiap bulan dan Temenggong Abdul Rahman menerima \$800 tiap-tiap bulan. Sultan dan Temenggong tidak boleh menerima cukai dari tongkang-tongkang Cina dan orang-orang Cina yang datang dan keluar dari Singapura.

Selain dari itu, kandungan perjanjian itu juga menyebutkan bahawa seluruh pulau Singapura dan pulau-pulau yang berdekatan dengannya kecuali kawasan tanah yang diuntukkan bagi kediaman Sultan dan Temenggong, boleh dibuat apa sahaja oleh pihak Inggeris. Residen Inggeris di Singapura boleh mendahulukan wang kepada Sultan untuk baginda gunakan bagi membina masjid yang elok berhampiran dengan istana baginda dan juga membantu Temenggong Abdul Rahman berpindah dan membuat tempat kediamannya.

Pihak Inggeris telah menjalankan tipu muslihat mereka untuk merampas Singapura daripada kuasa Sultan Husain dan Temenggong Abdul Rahman. Ini berlaku dalam bulan November 1823, di mana Crawfurd yang menjadi Residen Singapura menghadapi masalah dalam menjalankan pemerintahan di Singapura kerana Sultan Husain dan Temenggong Abdul Rahman masih lagi berada di pulau itu dan kedua-dua mereka saling bermusuhan antara satu dengan lain. Cadangan Crawfurd untuk mengambil terus pulau Singapura dari tangan Sultan dan Temenggong dipersetujui oleh Kompeni Inggeris dan mereka juga telah memberikan sepenuh kuasa kepada Crawfurd untuk menjalankan tindakannya mengambil Singapura. Oleh itu, John Crawfurd telah menahan wang pembayaran bulanan kepada Sultan Husain dan Temenggong Abdul Rahman sehingga 3 bulan berturut-turut. Alasannya ialah pihak Inggeris tidak ada wang untuk membayarnya.

Akibat daripada perbuatan ini, Sultan dan Temenggong

mengalami kesempitan wang yang amat sangat sehingga mereka berdua mendapati susah untuk menyelenggarakan tanggungan mereka.

Crawfurd telah mengemukakan maksudnya supaya Singapura diserahkan ke tangan Inggeris dan Sultan akan diberi \$33,200 dan gaji sebanyak \$1,300 sebulan sehingga akhir hayat baginda. Sementara itu Temenggong akan diberi wang hadiah \$26,800 dan gaji sebanyak \$700 tiap-tiap bulan.

Jika Sultan dan Temenggong keluar dari Singapura, Sultan dan Temenggong akan mendapat hadiah tambahan sebanyak \$20,000 dan \$15,000 seorang. Oleh kerana Sultan dan Temenggong masing-masing kesempitan wang, maka mereka bersetuju dengan tawaran itu. Akhirnya pada 2hb Ogos 1824, Singapura telah ditinggalkan dan jatuhlah seluruh Singapura ke tangan Inggeris. Dengan itu, Singapura tidak lagi di bawah jajahan takluk Sultan Husain mahupun Temenggong Seri Maharaja Abdul Rahman. Setahun kemudian Temenggong Abdul Rahman mangkat dan digantikan oleh putera baginda, Tun Ibrahim sebagai Temenggong Seri Maharaja Johor.]

Pada tahun 1835, Sultan Husain mangkat di Melaka. Baginda tidak meninggalkan sebarang harta kekayaan kepada warisnya melainkan hutang keliling pinggang. Ini menyebabkan keluarga baginda jatuh miskin dan kesempitan wang untuk menyara hidup mereka. Kini, sedarlah Sultan Husain bahawa baginda telah diperdayakan oleh orang-orang Inggeris.

Setelah kemangkatan Sultan Husain, orang besar-besar Melayu Johor melantik Tengku Ali, putera baginda untuk menggantikan Almarhum ayahanda baginda sebagai Sultan Johor. Tetapi kerajaan Inggeris tidak mahu mengiktiraf perlantikan ini. Orang besar-besar Johor tidak dapat berbuat apa-apa. Kaum keluarga Tengku Ali merayu agar Tengku Ali diberi wang penceh memandangkan keadaan kewangan yang

sempit. Pihak Inggeris bersetuju dan memberi \$250 tiap-tiap bulan kepada baginda dan juga Temenggong Ibrahim.

Setelah Tengku Ali meningkat dewasa, baginda telah berulang kali menghantar surat rayuan kepada pemerintah Inggeris supaya mereka mengiktiraf perlantikan baginda. Tetapi pemerintah Inggeris masih tidak mahu mengiktirafkannya.

Dalam masa Tengku Ali sibuk mendapatkan pengiktirafan Inggeris sebagai Sultan Johor, Temenggong Ibrahim pula telah mengambil hak membeli dan menjual getah perca dan beliau dapat mengumpul wang yang banyak. Temenggong Ibrahim juga mempunyai hubungan yang amat rapat dengan pihak Inggeris sehingga beliau mendapat kuasa untuk memungut cukai di negeri Johor. Hal ini membuatkan Tengku Ali irihiati kerana sepatutnya bagindalah yang mendapat hak tersebut.

Perselisihan telah berlaku di antara Tengku Ali dengan Temenggong Ibrahim kerana ingin berkuasa di Johor. Akhirnya, setelah 20 tahun ayahanda Tengku Ali mangkat dan setelah berjuang sekian lama, Tengku Ali telah diberi gelaran "Sultan Johor", bergelar Sultan Ali Iskandar Shah pada 10hb Mac 1855. Walau bagaimanapun, gelaran ini tidak membawa apa-apa makna kerana baginda tidak mempunyai kuasa mutlak sebagai seorang sultan ke atas seluruh negeri Johor. Serentak dengan itu juga permusuhan baginda dengan Temenggong Ibrahim ditamatkan. Sejak itu, seluruh negeri Johor dan kerajaannya telah terserah langsung kepada Temenggong Ibrahim dan waris-warisnya. Semenjak itu juga, Temenggong Ibrahim yang menetap di Telok Belanga, Singapura semakin rajin pergi ke negeri Johor sambil memeriksa tempat-tempat dan daerah-daerah dalam negeri Johor dan melantik ketua-ketua pada tempat-tempat yang difikirkannya patut.

Orang-orang Sultan Ali menganggap Temenggong Ibrahim seorang yang sompong. Ini membangkitkan kemarahan orang-



Maharaja Abu Bakar

orang Sultan Ali dan juga orang besar-besar Melayu terhadap Temenggong Ibrahim. Mereka pun mulalah membuat helah dengan mengatakan perjanjian tahun 1855 itu tidak sah disebabkan Sultan Ali tidak berunding dengan orang besar-besar. Walau bagaimanapun helah itu tidak berjaya membatalkan perjanjian itu.

Temenggong Ibrahim mangkat dalam tahun 1862. Sejak kemangkatan beliau, Sultan Ali tidak lagi mencuba hendak mendapatkan negeri Johor dari tangan puteranya, Wan Abu Bakar bergelar Temenggong Abu Bakar Seri Maharaja Johor yang dilantik sebagai penggantinya. Temenggong Abu Bakar telah melipatgandakan usahanya memajukan negeri Johor. Beliau telah melawat ke merata daerah Johor dan membaiki pemerintahan ayahnya dahulu.

Pada 1hb Januari 1866, satu istiadat telah diadakan di Bandar Tanjung Puteri. Istiadat ini ialah bersempena untuk menukar nama Tanjung Puteri kepada Johor Baharu oleh Temenggong Abu Bakar Seri Maharaja. Nama baru ini kekal hingga sekarang.

Dalam bulan Jun 1868, suatu majlis penuh adat istiadat telah diadakan di Johor Baharu. Pada masa itu diisytiharkan gelaran Temenggong Abu Bakar Seri Maharaja Johor ditukarkan kepada gelaran Maharaja sahaja.

Maharaja Abu Bakar adalah seorang pemerintah yang bijak, terkenal dan disukai di kalangan orang-orang Inggeris di Singapura. Baginda telah menjadikan Johor Baharu sebagai ibu negeri Johor. Bandar ini semakin pesat membangun dan penduduknya pun meningkat. Bandar Johor Baharu adalah kecil tetapi mewah dan penduduknya lebih kurang 15,000 orang. Di bandar ini juga letaknya istana tempat persemayaman Maharaja Abu Bakar dan pejabat-pejabat kerajaan.



Sultan Ibrahim


Sementara itu, Sultan Ali mangkat pada tahun 1877. Maharaja Abu Bakar pula mangkat di London pada 4hb Jun 1895. Putera baginda iaitu Tengku Ibrahim telah diisyiharkan sebagai Sultan Negeri Johor pada 7hb September 1895. Ketika itu, Sultan Ibrahim berusia 22 tahun. Selepas tamat sekolah, baginda memasuki Pasukan Askar Johor. Pangkat baginda dalam Pasukan Askar Johor ialah sebagai Leftenan Muda.

Semasa dilantik menjadi sultan, baginda dapati perbadanan kerajaan negeri Johor kosong. Oleh itu, baginda mengenakan peraturan yang agak keras di mana penggunaan wang negeri disebat dan tidak boleh dikeluarkan sesuka hati.

Dalam tahun 1909, jalan keretapi di negeri Johor yang menyambungkannya dengan Negeri-negeri Melayu Bersekutu telah dibuka kepada orang ramai. Johor Baharu disambungkan oleh feri ke jalan keretapi Woodlands di Singapura hingga ke bandar Singapura. Sejak jalan keretapi dibuka, perhubungan kenderaan di antara Johor dan negeri-negeri Melayu lain telah bertambah mudah.

Pada masa itu juga pekerja-pekerja buruh sedang menyiapkan sebatang jambatan yang menghubungkan Johor Baharu dengan Singapura. Jambatan ini dipanggil Tambak Johor. Panjang tambak ini ialah 1056 meter. Pembinaannya memakan masa kira-kira 4 tahun. Tambak Johor dibuka dengan rasminya pada 24hb Julai 1924 oleh Pesuruhjaya Tinggi Negeri-negeri Melayu Sir Laurence Nunns Guillemard.

Pada tahun 1942, ketika Jepun menyerang Tanah Melayu, makanan yang banyak disimpan dalam pejabat kerajaan Johor Baharu telah dibenarkan oleh Sultan Ibrahim supaya diberikan dengan percuma kepada orang ramai. Dalam bulan September 1945, Jepun menandatangani surat perjanjian menyerah kalah tanpa syarat. Kerajaan Inggeris mahu membentuk Malayan Union iaitu suatu pemerintahan baru di mana semua negeri Melayu, kecuali Singapura disatukan.



Dato' Onn bin Jaafar

✓

Rancangan British ini mendapat tentangan hebat dari orang-orang Melayu. Orang-orang Melayu sedar bahawa British mahu merampas kuasa Raja-raja Melayu yang bererti merampas hak kedaulatan bangsa Melayu dan tanahair. Oleh kerana kuatnya bangkangan orang-orang Melayu yang dipimpin oleh Dato' Onn, maka cadangan Malayan Union telah dapat dibatalkan.

Pada masa Sultan Ibrahim bersemayam di London, baginda semakin uzur. Akhirnya baginda mangkat di London pada 8hb Mei 1959. Ketika itu baginda berusia 86 tahun. Pada tahun itu juga, Sultan Ismail telah dilantik sebagai Sultan Johor. Baginda adalah seorang Raja Melayu yang berani dan tegas dalam menjalankan pemerintahan. Sultan Ismail mangkat pada 10hb Mei 1981. Pemerintahan negeri Johor seterusnya diserahkan kepada Sultan Iskandar Shah Al-Haj. Baginda telah diisyiharkan sebagai Sultan Johor Ke-23 pada 11hb Mei 1981.

Baginda Sultan Iskandar Shah diputerakan pada 8hb April 1932 di Istana Semayam, Johor Baharu. Baginda mendapat didikan awal dari beberapa orang guru khas yang datang mengajar di istana. Baginda kemudiannya menuntut di Maktab Inggeris Sultan Abu Bakar, Johor Baharu. Seterusnya, baginda dihantar ke Trinity English School, Australia dan juga ke Devon Technical College, England. Sekembalinya dari menuntut di luar negeri, baginda berkhidmat dengan Perkhidmatan Awam negeri Johor untuk menambahkan pengalaman baginda dalam urusan pemerintahan negeri sehingga tahun 1959. Antara tempat yang baginda pernah bekerja ialah di Pejabat Tanah, Pejabat Daerah dan Perbendaharaan. Baginda menjadi Tengku Mahkota Johor pada 8hb Mei 1959.

Pada tahun 1966, baginda dilantik sebagai Raja Muda Johor dan dalam tahun 1981 baginda dilantik sebagai Sultan



Sultan Iskandar Shah

24 MAY 1988

Negeri Johor. Pada 26hb Februari 1984, Sultan Iskandar Shah Al-Haj telah dipilih menjadi Yang di-Pertuan Agong Malaysia yang kelapan oleh Raja-raja Melayu yang bersidang pada 9hb Februari 1984.

Baginda mempunyai sifat-sifat kesederhanaan dan gaya baginda yang tersendiri telah meletakkan diri baginda di hati rakyat. Baginda seorang raja yang berhemah tinggi serta mempunyai falsafah hidup yang tersendiri.

Setelah memerintah Johor selama empat tahun lebih, baginda telah membuktikan kewibawaan baginda sebagai seorang pemerintah yang disegani dan dihormati oleh semua pihak. Kini, baginda bukan sahaja dimiliki oleh rakyat Johor tetapi telah menjadi "payung mahkota" dan pelindung bagi seluruh lapisan rakyat berbilang kaum di Malaysia.